



## 來去竹田寮

屏東縣竹田鄉有超過一半係客家莊，超過一半人口係客家人，在以前六堆裡背係中堆。竹田个舊地名安到「頓物」，因為東港溪同隘寮溪在這會合，米同貨物係靠水運載到東港，在熱天落大雨、東港溪發大水个時節，船仔做毋得駛地，就會將貨物寄在竹田，等到水退地正做得駛船仔。這就係「頓物」个由來。

就因為愛恁仔載運貨物，故所竹田係盡早發展个所在。佢還保留早期日本時代起个木造車站，毋過因為坐火車个人客漸漸少地，竹田站差一息愛廢站，好得愛鄉愛家个社區人士死命拈爭取，政府正撥經費下來修整，又在月臺做過新个車站。這下舊車站仔改做「竹田驛園」，寮日時節會辦活動，吸引觀光客來這細細个、有舊味緒个火車站寮。

火車站脣口个倉庫改建做李秀雲先生紀念攝影館，也做得去看，你會感覺歸到五、六十年該純樸个農村時代，用鏡頭記錄先民生活、客家文化同風俗个展現，有相當个歷史意義。還有頭前个德興碾米廠，還看得著盡懷念个礱穀機同精米機，管路共樣保留木造个，說明地早期个竹田確實係繁華之鄉，也係資源豐富个米倉。

六堆忠義祠也在竹田，佢原名「忠義亭」，係清朝康熙年間建立个。該時節發生鴨麻王朱一貴事件，南部客家人為著保護家園，成立六隊義勇軍對抗，犧牲个先民就奉祀在這忠義亭。落尾又出堆幾下擺，得著皇帝頒个「褒忠」匾額，對這做得看出客家人愛國精神。來忠義祠欣賞建築之美，兼懷念過去客家先人勇敢奉獻、毋驚死个大愛。

屏東客家文物館就在忠義祠後背，係圍龍屋个設計，看起來有現代感，又有客家个元素在裡背。在館內收集盡多客家文物、先民生活用品同農具，還做得體驗自家動手做个檳榔扇哦！這滿為著保留客家文化，還有開設各種課程：客家花布、藍染、客家美食、老街个導覽……毋單只分人緬懷頭擺，又重視文化个延續同傳承。

這滿為著身體康健設想，嶄然多人選擇騎自行車運動，鍛鍊身體又可以欣賞沿途个風景。堵好竹田有國道三號同八八快速道路經過，在這下背，規劃完整个自行車道；過來在全鄉也規劃鄉道分自行車方便來行，分北路線同南路線。來這靚靚个竹田，騎等毋會製造汙染个自行車慢慢仔踏，感受醺醺个客家風情同涼涼个風，應該係人生盡好个享受。

歡迎你一個人或者邀陣來去竹田寮。

作者：吳秀梅

### ☆詞彙練習☆

【頓物】dun` vud：囤放貨物。

的外殼磨脫的機器。

【發大水】bod` tai sui`：發生水災，溪水暴漲。

【邀陣】ieu` ciin：呼朋引伴、邀約。

【死命拈】xi` miang gu`：拚命。

【礱穀機】lung` gug` gi`：以轉動的礱將穀